

摘藻堂四庫全書薈要

集部

欽定四庫全書薈要卷一萬六千九百七十九

集部

大復集卷二十二

明 何景明 撰

五言律詩八十一首

雨雪曲

蒲海雲成陣
天山雪作花
長城烽火入
野騎動鳴笳
霧深迷漢月
風起暗胡沙
一夜關河冷
征人盡念家

星變

星變干常紀花開與令違九重方避殿四海望垂衣賦
斂何時緩流亡幾處歸廟堂圖至理早晚答天威

冬月

冬月今宵滿他鄉此夜情城高初影堞樓靜故當楹霧
濯寒輝苦風吹夕暈生捲簾愁不寐庭樹宿鴉驚

月食

月蝕中秋夜中天萬國看衣冠連大內鐘鼓動長安光
沒天河曉陰沈渤海寒聖心應念此長望五雲端

九月十五夜月

萬里高秋月青天此夜看乍流關塞影遙出海雲端
浙開風幔輝輝傍菊欄清笳奏城闕為報漢宮寒

中秋無月

月賞今年罷高樓獨客愁關山中夜笛江漢故鄉舟
暗雨捎簷入秋螢度檻流應知雲霧上天柱有人遊

六月望月食

未月黃衢厄妖遮赤道行魄殘疑近晦食甚始生明
奏

鼓風飈慘登壇雷雨清
機槍猶未掃天意豈休兵

元日

元日王正月傳呼晚殿班
千官齊鵠立萬國候龍顏
辨色旌旗入衝星劍珮還
聖躬無乃倦幾欲問當關

五更

五更霜雪霽忽夢紫宸班
天上傳鐘鼓風前想珮環
鷄鳴無復詠馬動亦虛還
憶在先朝日朝朝見聖顏

三月三日

病眼看天地風沙當晝吹賞心孤酒伴行樂過花時水
曲蘭芳靜城陰柳絮遲東郊有車馬春色報人知

秋夜

暝砌凝寒色高樓閉綺櫳露蟲吟蟋蟀風葉下梧桐此
夜關山月何人悵望中泠然感秋思况復聽征鴻

元夕

燈火萬家歡高樓玉漏殘舞留華月緩歌裊綠雲繁雪
郭春初霽烟城夜不寒畫橋垂柳外遊女珮珊珊

十月一日二首

今日孟冬朔輕烟澹曉暎北風飄一鴈寒氣入千門消
息斷行客關河迷故園浮生元不定俯仰任乾坤

二

嚴霜淒卉木茲歲忽將周寂寂龍蛇蟄寥寥江海流暮
燈喧巷哭風角起邊愁不盡中原望難尋萬里樓

歲晏

歲晏看人事蒼茫繫所思浮雲當日暮積雪見春遲報

國元無術寧親未有期獨憐張內侍吟絕四愁詩

中秋

風塵悲海內滿月對長安聞道王侯第中宵宴未闌
過雲吹玉管生水弄金盤獨念南征將關山此夜寒

三月三日

三月正三日長安春可哀鴈從南國至花向北人開
戎馬中原地鄉關萬里臺蹉跎嘆物色容易歲年催

清明日病懷

旅舍清明日長安新火烟桃花轉愁思竹葉興蕭然客
病閒官馬囊空澁俸錢故鄉聞稍定南望好林泉

謝崔太史惠菊

遺我高庭菊懷君秋樹林香添竹葉盞色助草堂吟翠
蓋翻風檻霜天倚玉簪晚芳如不歇可比歲寒心

觀荷

入院高荷密留尊菡萏遲絳房扶水萼翠蓋倚風枝檻
坐明星夕牕過驟雨時流螢點點度故傍綠陰池

寺中吾子館海石榴

西林雲晝靜覆院海榴花坐映東牕下疑窺隣女家
枝搖綠水片片落丹霞錯比珊瑚樹光輝逼一作日華

汝慶宅紅菊二首

紅菊開時暮亭亭冠物華亦知顏色好不是艷陽花
羅綺嬌秋日樓臺媚晚霞清香如不改常傍美人家

二

秋花何太艷綠盞慰飄零笑比西施醉愁憐楚客醒雲

高開爛漫烟細裊娉婷好為多沽酒頻來倒玉瓶

沈道士館牡丹

仙亭牡丹樹不數玉山桃忽漫相逢處開花爛漫高彩
雲停度曲遲日動揮毫明歲天壇路春風憶錦袍

雨中紅芍藥

百花堪獨立一雨更風流日暮行雲女仙裳覆楚丘明
添丹臉淚暗抱錦心愁晴晝猶須賞何人駐紫騮

長安柳

三月長安柳春風吹暮天花飛御溝水葉傍漢宮烟繞
岸猶堪折臨流更可憐故園無限樹零落戰場邊

芍藥

城中芍藥徧席上把殘枝上苑相看日春風爾教遲艷
歌翻錦瑟酣醉倒金卮南國今開罷園亭數夢思

觀竹

相國西垣第新看種竹成葉香鳴鳳宿根古蟄龍生雨
洗琅玕色風傳竽籟聲山林輕肉食心跡喜雙清

魯山院竹

泰公堂下竹覆地長新篁雨飈春牆碧風含石室涼經
行留下榻晏坐對焚香遺響流笙鳳時時落上方

聞鴈

見汝今南下憐予一望家亂聲求侶急高影背人斜月
靜林無葉雲寒菊有花萬行關塞淚秋日墮胡笳

鸚鵡

不恨金籠閉其如鐵鎖牢側身燕雪苦垂翅隴雲高豈

為能言語番令妬羽毛
鷹何猛氣翻掣錦鞬絛

春鴈

花初背楚澤雪罷度桑乾
漸起隨春色高飛犯朔寒
書停江國望陣倚塞門
看憶爾常南北無嗟行路難

鴈

噫噫胡笳怨飄飄南鴈翔
長風度關塞九月下瀟湘
積水浮連影遙空起斷行
故園秋望盡聞爾淚沾裳

聞鴈

鳴鴈南方去人今北地聞水寒沈塞角沙暮起秋雲獨
叫如求侶相呼恐失羣高樓潛望爾鄉思轉紛紛

麋

碧山誰放汝華館故相羈野性看人駭閒身顧影疑草
香春過處花暖晝眠時無限雲林好樊籠祇自悲

蘇子遊赤壁圖

垂老黃州客高秋赤壁船三分留古跡兩賦到今傳落
日寒江動青天斷岸懸畫圖誰省識千載尚風烟

彼美東鄰子

彼美東隣子花間白日醺纖腰人不見妙曲轉愁聞舞
罷空明月歌餘尚彩雲章臺楊柳樹花暮落紛紛

雪夜九梅翁園同蒼谷宴集二首

邨城風雪夜騎馬叩誰門乘興寧迴棹寬愁數倒尊
苑堂開洞壑楓岸疊沙村朝市山林意非翁未易論

二

冬夜南園集携遊興未窮登臺望積雪下嶺逐迴風駿

愛林中馬冥思海上鴻不因蒼谷子誰識九梅翁

到鄠簡王敬夫

以下秦集

杜曲花無數城南柳更重去天惟尺五隔歲一相逢雨
過春陂水雲開紫閣峯好陪王學士杯酒日從容

同敬夫遊至華陽谷間歌妙曲

名邑今重過終南第一遊山中白雪倡天上綠雲流柳
散秦川色花含杜曲愁同時霄漢侶十載卧林丘

過康子德涵彭麓別業

不求金馬召翻愛碧山棲柳色閒門閉桃花曲徑迷酒
船時問字翠壁有留題只此林泉好無煩到滸西

荅張道夫都閫病懷

不到將軍第秋清病起遲誰知平子後復有四愁詩月
幌臨書帖風庭掩戟枝東橋好山水何日赴幽期

九日同陳侍御鳳谷登宴

栢臺驄馬使蘭谷鳳仙家暫駐三秦節來看九日花風
霜高錦樹雲日麗清沙去去層霄上回瞻北斗斜

送閒雲子還河內

爾西訪崆峒東隨河上公
神仙自有友不與世人同
王屋留雞犬天壇躡斗虹
白雲從此駕去去無窮

卧病簡汝濟士奇時濟二首

卧病常遲起焚香獨燕居
聊因謝簿領暫得弄琴書
嶽色盈虛牖泉流繞暗渠
雖然官府內不異在林廬

二

習隱開三徑耽幽構一齋
吏人稀到戶鳥雀自馴堦
藥

補身差健詩成悶強排同聲二三子不見好音來

懷一作

過馬谿田村居

宛宛清河曲團團翠竹村卧龍元勝地容駟已高門野
曠嵯峨出天寒雲霧屯何時還過訪無限欲相論

冬夜過仲木

漢殿詞臣第秦川處士家過過逢遙慰藉文翰轉光華夜
興山陰雪春情渭北花江湖望霄漢相對一長嗟

寄彭幸庵中丞

山海藏身遠朝廷屬望頻駿功收戰伐龍卧偃經綸星
宿黃河氣風雲華嶽神生才元有待終起慰斯人

贈張時濟陳伯行胡承之周少安三月三日出城

遊宴

芳筵開上日才子出京華暫別含香署俱停訪石槎秦

川平對酒漢苑曲穿花應共題春草相過謝客家

是日
蓋時

濟邀
諸君

送張行人賁大行皇帝遺詔使秦蜀

我皇忽晏駕君行辭直廬九霄持使節萬里捧哀書湖
望雙龍鼎橋回駟馬車錦城花滿樹爭識漢相如

清明日病卧聞三司諸公出城

伏枕花辰過閉門尊酒空賓朋臨水上供帳出城中柳
色龍池雨鶯歌杏苑風秦川多勝事遊賞未能同

秦府進歷

寶歷頒天闕金樽宴錦軒萬年周正朔七葉漢宗藩向
日冀階曉含風蕙砌暄同懽承睿款歌舞頌乾元

拜將壇

漢主西封日淮陰拜將時壇場如往日朝代幾遷移王
氣風雲歇雄圖日月垂江山弔故國誰復見旌旗

秦嶺謁韓祠

捫蘿登峻嶺級石上荒祠雪阻南遷路雲停北望時文
衰真有作道喪已前知千載經行地高山空爾思

登五丈原謁武侯廟

風日高原暮松杉古廟陰三分扶漢業萬里出師心星

落營空在雲橫陣已沈千秋一瞻眺梁甫為誰吟

普緣寺有馬融讀書洞

春山尋古寺昏黑尚攀緣仄徑千盤轉巉崖萬仞懸虎
常啼白晝猿忽墮青天欲訪名賢洞泠泠隔澗泉

書院課士雨至有作

雨色間堂靜橫經坐晝深笙歌非絳帳絃誦有青衿竹
勁捎簷碧松寒覆院陰萬人憂旱日洗耳聽秋霖

登樓鳳縣作

近訊中原使兼登萬里樓朝廷仍北極行在且南州峽
斷風雲隔江通日月流如聞乘八駿早晚向崑丘

東河三月晦日

雨宿東河夜送春山館寒遠沙霾霧樹危石上風湍慣
涉波濤險偏經道路難平生四方志回首欲求安

青峯閣曉霽

初日東峯上微微霽色分丹崖含宿雨青嶂拂歸雲候
騎林端發鳴笳樹裡聞前山更可愛晴望碧氛氤

草店雨行

山館夏陰澹雨行寒色淒奔湍迴白石折坂下青泥棧
道常通北江流却向西千峰問來路烟霧使人迷

馬道驟雷雨復霽

萬壑驚雷起千峰鳴雨過稍看風瀨減更覺夏雲多虹
飲垂青澗猿行掛碧蘿山中無吏事長嘯荅樵歌

弘道書院

梁棟起層雲松筠散夕曛九峻瞻泰岱清渭接河汾冠

蓋時時集絃歌夜夜聞登堂持節印衰薄愧斯文

咸陽原

千秋陵墓地駐馬惜茲行晚日登原殿晴天見渭城望
春時極目訪古獨含情奈有咸陽草風吹歲歲生

草堂寺

昔讀高僧傳今看勝地形院寒留檜栢殿古落丹青寶
塔叅遺影荒臺問譯經駐車春日暮散步出林坰

說經臺

西海何年去南山萬古存風雲留福地星斗上天門有
欲誰觀妙無為自覺尊青牛不復返空誦五千言

普緣塔

石蓋凌空起丹梯出翠微雲從珠頂覆燈轉鏡中輝鴈
沼波濤湧龍宮日月圍何能攀絕頂一覽漢邦畿

磻溪

丈人昔未遇垂釣此溪中不感風雲會誰知八十翁晚
楓漁浦暗春草獵原空獨令千載下懷古意無窮

長春宮

夜宿仙人館晨聞鳳吹停
玉牕開曉月丹井汲春星
久秘長生訣空留不死庭
下山回一望巖壑杳青冥

益門

益門通漢沔棧閣上雲霄
蜀道從茲始秦川望已遙
生風隣虎穴迴日過龍標
眇眇征途子雲山誰見招

新開嶺

塹山通大谷槎嶺掛天梯
倚一作獨立飛雲上回看落日

低異花千種色恠鳥百般啼晚就松林宿烟昏度碧溪

一作寒烟

下碧溪

柴關

連峰入冥雨絕壁閃餘霞水認秦人洞林疑謝客家石
門踐苔蘚源口覓桃花他日求棲息無言此路賒

武關

北轉趨劉堪西盤出武關微茫一線路迴合萬重山天
地幾龍戰風雲惟鳥還關門鎖溪水日夜送潺湲

昭烈廟

漂泊依劉計間關入蜀身中原無社稷亂世有君臣峽路元通楚岷江不向秦空山一祠宇寂寞翠華春

鹿苑寺

即摩詰宅

舊宅施為寺青山屬野僧高人不可見勝迹已無憑色借荒庭草陰垂古殿藤千崖一微逕異代幾攀登

過華清宮

冬一作偶駐華清殿千秋憶翠華青山無帝宅荒草半人

家雪下湯泉樹春回繡嶺花長安望不遠誰見五陵霞
望終南

近覽南山霽遙迎西日曛黛橫千里色花抱

一作挹

五臺

雲城闕行相映川原望轉分丹梯懸石洞未訪赤霞文

首山

王君首山下新起讀書樓雲霧懸蘿入湍波湧竹流
具茨黃帝宅嵩少羽人丘想待功成去方為此地留

兩河口

東下商南路西辭蜀北門青山兩河口古戍百家村曲
棧盤林杪危湍噴石根經過回白首蹤跡半乾坤

大復集卷二十二



總校官庶吉士臣侍朝

校對官編修臣馬啟泰

謄錄監生臣令狐慕蜀

欽定四庫全書薈要

集部

大復集卷二十五

三至

詳校官候補通政司經歷臣郭祚職



欽定四庫全書薈要卷一萬六千九百八十

集部

大復集卷二十三

明 何景明 撰

言排律二十六首

上李石樓方伯

以下家集

三晉多人傑吾師出固然素汾經太岳紫塞入幽燕世
業端居里名邦倚舜田由來天運復誰謂地靈偏郭相
慚先達王通俟後賢明經超第一射策對三千感會逢

昌紀登庸起少年
劒鋒寒照雪辭藻麗生煙
博物張華讓多才子建
憐八义迎客賦隻字使人傳
豈獨文章貴還應器識全
雄談飛玉露浩氣豁金天
亮節唐元振英風魯仲連
青雲仍自致黃鵠任孤鶩
簪筆星辰上持書日月前
觸邪稱獬豸特立憚鷹鷂
東觀臨晨入西臺薄暮旋
朝回焚疏草吏散閱陳編
百采班行整羣公禮數虔
一年巡洛表兩命下秦川
斧鉞威關隴舟船達澗瀍
石林風淅瀝霜仗月嬋娟
邊徼兵宵遁茅茨犬夜眠
激

揚弘憲度旌別布威權制作人文煥經行草木鮮闡幽
輝往哲訪古徧遺阡汲黯還辭漢張騫又使邊臺端堪
秉節湖上且移旃城接三江樹波通七澤蓮蠻夷思已
洽州郡役多蠲糾察元無隱焚囂肯自便駐車仁雨渥
登座法星懸遠泉馳譽久當途薦䟽聯碧梧看鳳跼喬
木待鴛遷分陝推公奭封侯得傳玄開藩臨宋苑張幕
傍河堧位重心逾下名高守益堅薇花當省署棠蔕滿
郊鄠聲價隆方鎮先芒動斗躔明堂求畫棟清廟想朱

絃冠準真時望王公勸早宣麒麟功不朽金石頌應鐫
愚本蓬蒿質那堪侍几筵垂髫蒙引拔撫志荷陶甄附
驥懷深願登龍感夙緣未除原憲病空負樂生愆舊業
心常在脩途步轉遄鸞鳴猶待律魚得敢忘荃草野瞻
飛蓋雲達望著鞭臨風歌此曲慷慨不成篇

寄徐博士二十二韻

有美雲間士才名洛下傳逢時不得意謫宦轉悠然殊
渥優文學清階謝糾纏班行亦霄漢官侶是神仙樓閣

星辰麗宮牆日月連院桃紅爛日闕檜碧參天賈誼為
王傅陽城淑後賢諸生攻誦法六館藉陶甄玉序金鋪
列虛廊石鼓懸雅音淒古調奇字索遺鑄劉向憂經術
揚雄困草玄羅傷廷尉宅座嘆廣文壇魯壁藏書日齊
門鼓瑟年青衿時涕淚學士盡奔遷鸚鵡愁金絡麒麟
恥玉鞭客心千里鴈歸興五湖船上國同傾蓋長宵更
接筵彩雲停翠管白雪繞朱絃悵別燕臺下淒涼楚水
邊海鷗終浩蕩天馬自騰騫朋舊稀相見江湖益可憐

因風問消息尺素幾時旋

寄邊太常

不薄淮陽守翻辭大省寮聯翩追近地奉引憶先朝碧
落仙人館銀河織女橋漢儀瞻鹵簿虞樂典簫韶日月
旂常動星辰劍佩搖聳身殊道路回首隔雲霄河內猶
宜借山陰豈見招乾坤五馬貴江海一麾遙雅識懷金
奏同遊嘆玉鑣歲年雙轂轉歧路一蓬飄鸞翮終難鍛
罵遷本在喬九苞應不遠覽德是何朝

復菴王公錦

斯人中土彥未老即重泉薦鶚推前達乘驄憶少年聲
名起霄漢詞翰落雲煙志在身先退才高道亦全劍橫
常自許寶棄復誰憐世業襄城舊孤墳汝路偏脩文應
地下遺像儼生前未得瞻風槩空令涕淚懸

愚菴王公瓌

大夫元曠達襟抱絕塵氛香署星辰列清班鷺鷥羣兩
都看宦達百家重廉勤要地能知止危途恥策勲早投

南郭隱不待北山文身向歸來健名從死後聞一官無
厚業諸子有餘芬鳴瑟哀梁木遺書落案芸風花虛館
榭烟草自丘墳野路東流水空山歲暮雲九原長不起
回首一懷君

雷

十月鳴雷動中宵萬壑哀初聞蟠地出忽覺繞庭迴夜
水蛟龍鬪寒山風雨來江濤何處折天柱此時推詎識
乾坤意深愁號令乖攬衣還不寐坐望積陰開

雨後溪園即事

偃息春朝晏輕陰散野園山雲行翠壁溪雨渡河源鷺
浴晴相倚鳬飛暖自喧疎楊映遠岸細草入平原開徑
徒懷侶臨流且避諠豹終隨霧隱龍豈怨泥蟠鴻鵠皆
千里雞豚自一村幽棲何限意難與世人論

中元節有感

去歲中元節朝陵百職同嚴趨神路左遙拜孝園東龍
虎瞻王氣乾坤仰帝功未迴衡嶽駕空墮鼎湖弓啟兆

龜圖順編年鳳歷終玉衣陳畫幄寶瑟閔玄宮北極猶
前日南薰亦舊風病居逢此日長望五雲中

九日

盜賊無休日憑高淚滿纓岷峨日悽愴江漢失澄清故
國遺軍壁孤城傍敵營兵戈生朔氣鼙鼓入秋聲吹帽
他時興登臺此日情賓朋共一笑俯仰異平生黃菊淮
川晚丹楓楚岸晴蹉跎粟里醉憔悴澤中行近郭青山
抱迴堤綠水縈長陰接遠甸短日背高城墟里孤砧發

關河一鴈鳴臨觴憂戰伐對食想昇平
元帥誰摧敵尚書尚用兵幽人獨北望
疲卒舉西征秋圃芳菲雜閒門鳥雀盈
垂蘿飄几席落葉裊簷楹夕竹捎煙勁
寒花泣露明光陰玄鳥變湖海白鷗輕
放逐寧違性棲遲且避名蒼生大臣在
莫自涕縱橫

悼馬詩

并序

予家買得一馬齒小而良丁卯歲季夏十五夜予忽夢一龍子立堦下跼蹐而死夢警僮在戶外呼曰廐

馬死廐馬死子怪且惜之作悼馬詩十韻

乘爾方踰歲何期病忽危四蹄猶未鑿雙淚泣長垂
渥水千年降房星一夜隳早逢田子嘆終共塞翁悲
顧影辭金絡遺骸戀敝帷詎能酬飼秣那復效驅馳
首霜殘空櫪莓苔滿故池風塵思駿力煙海失龍姿
惆悵玄黃句淒涼赭白詞平生精志在不愧主人知

郊觀二十二韻

以下京集

今代園丘地天開壯麗區神祇二后配禮樂百王殊制

作由皇祖儀章藉老儒萬靈欽受紀七聖亶承圖柴望
兼虞典登封畧漢模巍基錯采繪法象備堪輿丹戶乾
坤闢雕牆海嶽扶瑤壇上星斗琳觀俯虛無輔弼朝玄
座勾陳衛紫樞風含浴殿暖雲裊露盤孤好時瞻春祀
嵩高聽夜呼公侯守禁籙虎旅發金吾玉輦臨犧宰珍
饈走膳夫廟懸鏞鼓列庭舞羽干趨俎豆聯周簋圭璋
飾夏瑚祠官足錦繡道士住蓬壺澤草三花綻宮霞五
色敷時時聆磬管鬱鬱鎖松梧日月藏金櫃龜龍秘赤

符祈天洪洛誥渡海斥秦誣杜甫唐三禮班生漢兩都
侍臣從此賦千載頌文謨

壽許司馬

間代生豪傑乘時見哲人雄姿龍馬異偉器廟廊珍浩
蕩天開運崔嵬嶽降神扶持元有自制作固無倫磊落
先朝事崢嶸報主身九霄隨日月萬里出風塵柱下曾
簪筆臺端早曳紳觸邪持笏角糾繆逆龍鱗道直官頻
謫時危志不伸流言鑠金石雅操厲松筠行路知桓典

專城借寇恂清譽高士論優詔闡皇仁紫禁彈冠入黃
沙捧節巡謹謨仍寡合正氣凜難馴厚寵臨危辱幽期
邁隱淪班行看解綬河上羨垂綬謝卧東山裡夷歸北
海濱蒼生懸望切青瑣薦書頻改草逢多難倉皇憶舊
臣帝心虛簡在神武藉經綸指顧三邊靜吹噓四表春
朝廷推汲黯帷幄用陳遵圖識魚蛇變營觀虎豹旆赤
墀分雨露畫省接星辰下殿常宣問臨軒數見親御香
携袖滿瑞錦賜袍新不屈朱門貴能憐白屋貧散衙時

待士開閣晚留賓片善無攸伏微言得具陳重闈俱鑠
鑠諸子益振振賓氏燕山桂莊生漆園椿趨庭羅彩服
列鼎席文茵夢燕佳辰協乘牛紫氣真庶司欽軌範斯
世待陶甄願保喬松歲長登要路津頌聲垂琬琰勲業
上麒麟未進瞻休采愚衷實忤忻魏公中土彥誰謂德
無隣

壽泉山先生

德業台衡望精神先嶽靈漢儲懷羽翼周士服儀刑紱

烏登三省臯比擁六經飛章白獸闥解組鳳凰亭慷慨
陽城餞悽惶楚澤醒丹心對日月白首卧滄溟積慶濬
源濬垂芳奕葉馨彩衣萊子宴玉樹謝家庭海嶠神仙
窟煙霄鳬鶴翎棲身葺薜荔返老斲松苓花映衣裳古
芝凝眉髮青三山開壽域萬里動文星雨露知桃李春
秋報英靈聖朝耆俊禮早晚貢雲扃

簡粹夫

二十知學道于今猶未真白髮空愁我金丹不遇人側

身向天地舉足墮風塵乘雲空有興涉海浩無津間君
能鍊骨妙論頗通神倘惠長生術高揖謝親賓

送梁鴻臚之什加次孟望之韻

王官葉縣宰仙令漢庭聞寵餞傾朝俊清光憶近君鷁
舟三峽去鳬舫九霄分錦水流營月巴山入陣雲朝廷
再遣將郡邑半從軍雍齒封侯地期君早樹勲

寄贈王子衡御史時按關中

獨坐清關內臺中覺汝賢
函嶠天下險周召國風先
按

節人文朗登臺使命宣豺狼避驄馬神鬼泣龍泉文彩
驚流輩徵庸憶往年衣冠隨謁帝館閣望登仙省接星
辰近池臨雨露偏畏途逢改革新法忤權奸放逐江湖
去飄零歲月遷地卑棲鍛羽天近起聯翩殘寇猶衝突
蒼生極倒懸專征空授鉞募戰豈論錢漂血江河赤僵
尸楚蜀連俊才兼武畧要地有威權馬上排金戟軍前
贈玉鞭笑談安石計激切賈山篇漢苑南山下秦城北
斗邊相思一回首萬里各風烟

贈良伯

帝座神仙侶
天河烏鵲橋
常時異棲息
今日共雲霄
念子飛騰入
相看衢路遙
人猶惜騷衷
吾已嘆鷦鷯
苑旭高雲閣
宮花並玉鑣
明光羨起草
努力在清朝

贈劉生

劉生何激昂
下筆已成章
誰敢輕年少
吾尤重老蒼
王楊操翰墨
游夏早升堂
汗血真龍種
奇毛本鳳凰
炎天留玉樹
花夕映冠裳
霄路雲鴻羽
他時看爾翔

送鄭伯生送親還夷陵

送喜潘輿動承懽解玉簪私情烏鳥疏恩詔鳳凰林晝
錦供萊服秋懷罷越吟路難回馭志江穩放舟心雨露
殘冬景風塵靜夕陰荆門巴國盡巫峽楚宮深碧樹猶
春色黃鸝更好音莫因鄉土樂長往故山岑

間河南捷呈閣內諸公

近得河南定旋收東海疆元克親受縛餘孽遠潛藏始
失徐關險終連郢塞長狐狸窺社稷螻蟻竊侯王清洛

千營駐黃河一葦航詎能逃汝漢那敢傍嵩邱勇畧傳
諸將兵威借朔方中丞兼節制上宰極扶匡霽色瞻宮
殿陰氛散渺茫凱音連報捷獻壽屢稱觴天子開麟閣
羣公奉柏梁中興當此日漢武是今皇愴往衣冠禍哀
茲盜賊猖缺斨悲相國開網見殷湯格鬪中原血誅求
海內瘡猶須哀痛詔可少治安章斟酌調元氣扶持立
紀綱薦新行太廟覽政坐明堂不獨殲豺虎還應感鳳
凰蒼生倚君相拭目看時康

子衡在獄感懷二十韻

朋儔日乖蹇念汝涕如漬賈誼生非晚鄒陽志不羣書
從梁獄上哭向漢庭聞天地虞羅密江湖釣餌芬路豺
那可問屋鼠竟難重已懼蒼蠅點真成貝錦文神龍在
污淖鷺鳥失青雲日月盆還覆薰蕕器不分斗間誰辨
劍野外枉懷芹談虎嗟何及亡猿禍已云高才元脫畧
衆口但紛紜木直防先伐蘭芳忌自焚畫臺幽白日冬
井下霜氛曉榻明星晷陰牆白草曛連駭虛繾綣尺牘

阻慙慙石父遭齊相鍾儀滯楚軍受書賢不死演易聖
猶勤縲紲終非罪文章固有勲燕臣霜霰烈庶女震雷
殷佇見天王聖金雞早赦君

寄題丹陽孫氏七峰山房

聞爾山房勝青天秀七峰芙蓉疊日月雲霧裊杉松塔
倚岫巒積牕通洞壑重丹霞互明滅瑤草自春冬靜得
沈冥趣幽探仙聖蹤源潭暗雷雨白晝有蟠龍

蓉溪書屋

書屋蓉溪曲雲林蜀嶺斜一經韋相業萬卷鄴侯家檻
護連枝秀池看並蒂葩謝庭森玉樹漢省接金華山月
岷峨雪江天灩澦霞花潭通白石錦水出丹沙星野光
芒聚鴻霄羽翼遐地靈與文物今古擅三巴

方朔圖

調笑東方朔沈酣金馬門竊桃王母見懷肉漢皇恩月
下雙鸞返雲間八駿奔玉盤春不獻丹核代長存事往
丹青錯圖開錦繡屯素湍搖弱水玄圃折崑崙種樹非

潘縣迷花似楚村千年一結實萬古自蟠根
海日紅猶爛天風裊更繁神仙皆羽翼洲島異乾坤
無路乘黃鶴何由踏赤鯤市朝棲大隱那識歲星魂

友竹

買園惟種竹身與竹為儔一逕白雲裏千竿清吹幽
江亭朝對雨水榭早迎秋翠袖天寒倚朱絃日暮愁風因
故人至月為此君留逸駕今誰並前身是子猷人多嫌
寂寞吾獨慕清脩苦節長如此虛心不外求琴樽忘老

病几席共綢繆歲晚根逾固霜繁花益稠山空鷓鴣怨
海濶鳳凰憂高志寧須待深棲且自謀何因孤興發吹
笛上君樓

渡涇渭

以下秦集

北回亂涇渭東眺極澄瀛落日雨盪潏遙天雙帶紫波
流互明滅岸折屢崩驚

一作洲渚各縱橫

隔樹

一作歲

望迴合分

濤揚濁清堰渠饒上壤形勢迫西京漕挽通秦甸津梁
跨漢城湮沈九州會雄壯八川名空挹入河志復含浮

海情風沙滿世路雲浪渺江程鵲去星源遠鯨翻霧島
輕片帆儻可借萬里自茲行

大復集卷二十三

欽定四庫全書薈要卷一萬六千九百八十一集部

大復集卷二十四

明 何景明 撰

七言律詩六十四首

舟次漢陽 以下使集

使客舟從漢口來，武昌城對漢陽開。
千年洲在空流水，百尺樓高鎖舊臺。
太白未輕崔顥句，老瞞元妬禰生才。
山川不盡豪華盡，落日烟江思轉哀。

武昌聞邊報

傳聞賊騎近長安北伐朝廷已遣官路繞居庸烽火暗
城高山海戍樓寒一時邊將當關少六月王師出塞難
先帝思深能養士請纓誰為繫樓蘭

長安驛

暮雨蕭蕭雲黯黯數家山下起炊烟
門對寒流夜不眠遠使正持三楚節
舊遊曾扣九江船
驛程南去無窮路來往風塵閱歲年

雲溪驛

雲溪驛裏經過處六七年間兩度行
風土不殊初到日
雨牆難認舊題名異方見月思鄉
縣遠客逢秋念友生
明日巴陵江上酒弟兄相對不勝情

岳陽

楚水滇池萬里遊使車重喜過巴丘
千家樹色浮山郭
七月濤聲入郡樓寺裡池亭多舊主
城中冠蓋半同遊
明朝又下章華路江月湖烟綰別愁

岳陽城中聞笛

何處笛聲三四弄，坐聽疑隔楚江濱。
落梅折柳怨清夜，激羽流商哀白雲。
月上山樓人獨倚，風高秋院客先聞。
洞庭空濶瀟湘冷，縹緲餘音送鴈羣。

七夕

夜久高城風露收，微雲斜漢兩悠悠。
閨中擣素思關塞，樓上穿針待女牛。
屏燭夜深秋似水，池花香淡月如鉤。
桂宮高處寒多少，誰念嫦娥此夜愁。

寄君山

塵踪西過巴陵地尚欠君山寺裡詩十里無緣携客到
六年不見使人思空巖竹映湘妃廟舊井潮深柳毅祠
湖上老仙誰得遇夜寒橫笛向江吹

華容弔楚宮

別館離宮紛綺羅細腰爭待楚王過章華日晚春遊盡
雲夢天寒夜獵多廢殿有基人不到荒臺無主鳥空歌
西江烟月長如舊只有繁華逐逝波

秦人洞二首

桃川道士來相送，指點仙蹤玉觀西。
雲鎖洞門何處問，花開溪路幾人迷。
石橋自發新秋草，丹竈長封舊日泥。
落日山中不勝思，松陰竹色冷淒淒。

二

聞說秦人此避秦，碧桃零落舊時春。
家移洞裡難知姓，水到人間易問津。
山色溪聲自今古，石床磳戶空埃塵。
洞前即是南征路，來往年華客鬢新。

月潭寺二首

玲瓏金刹白雲邊
踏閣攀林一徑穿
龍出洞門常作雨
鶴巢松樹不知年
僧來殿上鳴鐘飯
客到山中借榻眠
恠底夜來難得寐
秋風牕下繞流泉

二

綠蘿陰下到蒲團
茗葉松花進晚餐
近水雲霞晴亦雨
傍巖樓閣晝常寒
旅懷寥落逢秋半
僧話淹留坐夜闌
惆悵塵蹤又南去
朝來鐘磬隔烟巒

出新添城

出城凝望一沾巾
行到窮邊見洞民
青草時多逢瘴死
白茅屋為住山貧
秋來萬里倦為客
日落千峰愁殺人
聞道徵兵需北戰
朔方應已困征塵

憶中舍諸寅

憶昨共陪天北極
幾回朝賀識龍顏
簾開仙掖宮雲近
地隔金河苑日閒
青瑣夜歸池上珮
朱衣曉入殿中班
只今遠使違趨奉
清夢常依霄漢間

憶諸同遊

冠珮長安多貴游
別來時復見新秋
花邊騎馬春遊寺
月下橫簫夜上樓
鴻鴈不傳長道字
江山應繫遠人憂
遙知賓館常懸榻
經歲誰能為我留

安莊道中

處處人家空薜蘿
幾年凋敝擾干戈
山過白水峰巒峻
路入盤江瘴厲多
嶺徼土風連百粵
郊原人語雜諸羅
側身西望看銅柱
此地曾經馬伏波

漢將祠

嵯峨高嶺入雲平，嶺上人傳漢將名。
殊域歲時供祭祀，千秋祠廟著神明。
古牆不辨丹青色，深夜猶聞劍戟聲。
下馬獨來詢舊事，殘碑無字紀南征。

新興

蕭條窮巷掩荆扉，立馬荒原見鳥飛。
城為燒殘廛市少，地從戰後草萊稀。
燐生陰雨黃昏見，鬼哭秋山白日微。
却怪當年出師者，豈無寸策達戎機。

普安

日下孤城生夕烟相逢只說敗師年
寨門晝閉青山上戍角寒吹白漠前
寇至不知重嶺隘兵來能得幾家全
居人尚想黔中將統領三軍獨晏然

九日黔國後園二首

何處風烟消客愁將軍臺榭枕山丘
一年又過重陽日兩鬢空愁萬里秋
水國陰多寒已至炎方霜後瘴初收
憑高欲送登臨眼更上池邊百尺樓

二

天空遠水明秋岸
梧葉蕭森楓樹殘
黃菊數從行處見
紫萸獨向醉中看
浮雲樓觀滇城暮
落日山川楚道寒
忽憶登高去年客
慈恩湖閣共憑欄

白帝城

峽口風悲猿夜號
孤舟燈火宿烟皋
草深廢井人家少
水落寒山雉堞高
自古金湯難恃險
當時版築豈知勞
永安亦在荒城裏
玉殿淒涼空野蒿

歸州

暮雲天際見高城行盡千峰峽漸平古郡山頭萬家住
客舟江上一燈明竹枝慣聽巴人曲烏道纔通楚國程
未卜東歸何日到片帆斜月對離情

郢中

荆門南下接平疇蕭索風烟似晚秋衰草茫茫楚宮廢
荒城寂寂漢江流人亡異代空遺宅歲暮他鄉獨倚樓
最是陽春音調古至今歌罷少人酬

呂公祠以下家集

落日蕩漾古水濱
邯鄲城邊逢暮春
趙王臺榭草花盡
呂公祠堂松桂新
馬上十年元是夢
世間何處可還真
黃金白髮俱閒事
赤日紅塵愁殺人

還家口號

十年奔走違親舍
此日歸來喜不禁
敢向明時輕組綬
祇緣多病乞山林
閒居擬著潘安賦
高卧寧知謝傅心
早晚南巖桂花發
開軒相望一長吟

高夔州先生示賞李秀才園中芍藥詩用韻奉答
李家芍藥開滿堂夔州太守更清狂題詩晚坐朱欄靜
對酒春憐白日長好為池臺留爛漫莫教風雨怨淒涼
佳期卧病難乘興悵望殘花憶謝郎

五日

五月五日天氣鮮艾葉榴花堆眼前鄉土歲時殊不惡
閭閻風俗自堪憐鄰人角黍能相送野老蒲觴得共傳
回首十年車馬地每逢佳節淚潛然

病後

病後頻驚節序過不將風景怨蹉跎秋來門巷依楓橘
歲晚衣裳戀芰荷洛下閒居辭宦早茂陵消渴著書多
鳳凰池上三年客驛裏空鳴白玉珂

吹笛

橫笛高城弄晚颼碧空如水鴈來時關山月落腸應斷
樓閣秋生響易悲楊柳天邊渾折盡梅花江畔故開遲
武陵回首南征路一曲那堪馬上吹

沈逸士來自吳下能詩善鼓琴間投篇什見訊顧
館於城中予以病不得造乃作此詩招致敝庄
寂寞秋山卧病年美人勞贈白雲篇陳蕃已下迎徐榻
王子寧回訪戴船郭外樓臺堪眺望水邊花樹足留連
廣陵失後無新譜莫惜携琴為我傳

邀沈清溪趙雪舟馬百愚登樓次百愚韻

村居邀客慚供給且為青山一倚樓十里沙平遙對酒
百年地迥更逢秋城中車馬何人到水曲風烟盡日留

無奈天涯歸思切孤帆八月下長洲

馬百愚同沈清溪見訪次韻二首

門接漁樵只數家柳條藤蔓轉相遮不妨佳句頻題竹
況有清尊共對花開閣定攀樓舊榻入溪還擬著浮槎
誰言人世相逢易浩蕩江湖未有涯

二

共憐野外多風景乘興閒過碧水涯草閣連朝閒雅詠
楓江萬里得佳期馬御作賦無勑敵沈約為文有妙思

莫向尊前話離別
雲山秋色易生悲

十一月五日雨中邀沈清溪趙雪舟

仲冬風雨似秋來
無客蓬門晝自開
幽抱向人那得盡
窮愁泥我若為裁
不禁遠岸梅花照
更見孤城柳色催
三徑已拚留二仲
相過此地莫遲迴

雨晴

竹裏柴門冬日輝
水邊烟霧晚霏微
背霜石壁丹楓盛
待雪沙田青麥稀
自愛羣鳬將子去
却疑雙鶴見人飛

西郊風物晴還好誰共看雲興不違

冬至

至日哦詩野水濱乍晴天氣最宜人
簷前白日不覺晚山下寒梅俱放春
遠客盤餐還偶共故園風俗自須親
病來又見陽回節鳴玉何由拜紫宸

立春

今年臘月逢春日喜見東風隔歲吹
沙上柳條已堪把城邊梅花亦不遲
離離山郡開雲雪冉冉鄉園易歲時

欲與隣翁試新酒相邀酩酊莫深辭

燕子次杜工部韻

燕子飛時江柳春眼看節序幾回新亦知社日歸鄉國
忍對秋風別主人舒卷不殊羣物理往來寧有百年身
空簾寂寞山堂夕惆悵花枝淚滿巾

秋興八首

高樓一上思堪哀水盡山空鴈獨迴萬里關河迷北望
無邊風雨入秋來故人尺素年年隔薄暮清砧處處催

徒有寒樽對花發病懷愁絕共誰開

二

憶在京華近侍年五更清珮入朝天鳳凰池接獲龍會
閭闔樓開日月懸南國自通滄海貢胡塵不動玉門烟
只今病卧遙回首夜夜清光北斗邊

三

前歲今皇新御極鳳銜恩詔出明廷孤槎奉使日南國
萬里題詩天畔亭地入金沙江浩浩風連銅柱海冥冥

昆明亦在滇城裏池上虛疑織女星

四

蜀中形勝千年在峽樹江花照使袍神女廟深虛暮雨
漢王臺迥落秋濤漁人東望滄浪濶客子西來艷潁高
不見啼猿繫舟處風波遙夕夢魂勞

五

漢水東馳入楚來長沙秋望洞庭開江清樓閣中流見
日落帆檣萬里迴去國尚思王粲賦逢時空惜賈生才

湘南兩度曾遊地惆悵烟花暮轉哀

六

秋來門巷少經過日日幽懷對薜蘿一笑流光拋客路
十年歸夢落漁簑沙邊返照寒初斂水上浮雲晚故多
苦憶梁園辭賦客黃河愁望渺烟波

時李獻吉
在汴州

七

裊裊西風歇衆芳天高谿谷迥烟霜孤城落鴈衝寒水
萬樹鳴蟬帶夕陽塵滿一區揚子宅蓬生三徑蔣公堂

相過未有裘羊輩醉裡狂歌亦自長

八

千年中國有提封楚塞重關渺未窮舊事祇看東逝水
高臺不斷北來鴻連山落木蕭條後隔坐殘花悵望中
正是平居多感慨底須辭賦荅秋風

聞望之買馬促裝以詩留之

聞君買馬衝宵發正為慈顏在遠京已喜尺書前日至
不妨旌節隔年行故鄉歲暮難為別長路天寒益繫情

擬辦盤餐留暫住
况逢風雪阻嚴程

同焦太史游青峰禪寺

裊裊丹梯百丈懸
上方宮在白雲間
川原暮過淮西雨
樓閣晴開楚上山
厭逐風塵為客久
喜將樽酒對僧閒
同遊更有情親在
並轡山中日往還

十二夜月

待月東林月未圓
水邊樓閣半輪偏
誰家玉笛休空怨
此夜清樽益可憐
即向乾坤生羽翰
更看江海淨風烟

停杯席上遙相問却愧當年李謫仙

人日懷孟望之

人日登高聊引興萬峰寂寞對申臺鶯花出郭還難見
雨雪逢春尚未開沙畔柳條悲暮角城邊柏葉照寒杯
關河悵望東歸使渺渺孤槎幾日迴

贈袁將軍惟武

雄劍光寒射早秋南征曾共伏波謀萬營貔虎胸中算
八陣龍蛇掌上籌誰識淮陰堪拜將獨知定遠合封侯

漢家武畧多名帥功在雲臺百世留

寄贈劉東山先生次林都憲韻

一疏歸來卧舊山幾回天上識容顏
城邊黃石留侯去海內蒼生謝傅閒
日月夢隨天闕仗烟波家在洞庭灣
南瞻江漢無多路不得乘槎一往還

寄懷端虛堂

草堂風物迥無倫夔府詩成更有神
携酒幾時容入社卜居今日願為隣
謝安亦有東山妓文舉元多北海賓

珍重城邊花竹樹年年不厭訪君頻

酬高新甫

連篇落落見才華未報瓊瑤祇自誇
靈運詩成應夢草江淹筆在更生花
行吟出郭愁仍破病起逢春思益嘉
不惜清詞三百首品題常到野人家

代孫太守自題沱西別業次劉東山先生韻兼酬
東山

黃鸝未比謝家莊綠野還連晉國堂
亭榭寥寥看市遠

江湖渺渺接天長，慚過高士蓬三徑。
喜望佳人水一方，安石他年如未起。
賦歸應許共徜徉。

寄張別駕

苦憶朗陵張別駕，尺書今忽到林丘。
江東亦起秋風興，溪上難忘雪夜舟。
山郭有花空悵望，水亭無客自淹留。
汀蘭岸柳俱相待，莫負清樽此日遊。

九日不見菊次劉朝信韻

一秋風物已淒涼，九日無花只斷腸。
徒把青樽留客醉，

不教繁朵向人黃鳴絃急管休相聒舞蝶遊蜂莫自狂
獨坐孤城正愁寂更堪落木下斜陽

夜坐

暮雨寒雲黯復開山齋獨坐思難裁水生門外沙鷗至
月落燈前江鴈來四海交遊總霄漢十年蹤跡但塵埃
長安不見空回首歲晚愁登萬里臺

九月二十六日同賈廣文劉舉人任貢士高夔府
先生宅內賞菊四首

陶令門前花盡開
郭西騎馬看花來
踈枝淡蕊寒仍發
細雨斜風晚更催
擬向夜深還秉燭
可憐秋盡始傳杯
相逢一笑真非易
共把繁枝醉不回

二

秋來搖落倍堪嗟
喜見孤芳殿物華
深院護籬元密密
小堂穿徑故斜斜
清詞屢動詩人座
白酒還逢處士家
老逐少來無住日
莫教空負滿頭花

三

淺白輕黃千萬枝幽香今日始相期雨中籬落人稀到
水畔亭臺蝶不知折向秋風堪寄遠種因晚節故開遲
去年此會今皆健來歲花時可對誰

四

野店山家開已殘寒來移近曲闌干亭亭似與霜華鬪
冉冉偏隨月影繁千里況逢佳客賞幾人能得故園看
清尊歲暮東籬下采采金花不滿盤

大復集卷二十四

欽定四庫全書薈要卷一萬六千九百八十二

集部

大復集卷二十五

明 何景明 撰

七言律詩六十六首

生子

兩歲歸來生兩雛故園夫婦亦相娛
盧家自愛添丁好徐氏誰言二子殊
未論圖書能繼業且教門戶有懸弧
劬勞正念吾親在更遣悲歡此日俱

溪上

溪上茅齋不掩扉
西風初罷芰荷衣
月寒沙柳蕭蕭落
天晚江鴻肅肅飛
野客哦詩水邊立
家人沽酒夜深歸
相逢醉語休辭數
城外黃花漸覺稀

無題

艷舞嬌歌出絳紗
黃金不惜教琵琶
鴛鴦本是雙棲鳥
菡萏元開並蒂花
紫玉豈忘韓重侶
綠珠寧負季倫家
多情自古還多恨
腸斷春風巷柳斜

次韻答莊國賓見訊

多病無能合罷官清時那敢獨求閒
遠沙月出明如水高樹雲來暗似山
已恨緇塵侵素服不教青鏡老紅顏
美人歲暮勞相問叢桂山中祇自攀

贈潁川張子辰秀才

聞君已是青雲翼萬里飛騰竟若何
縱有當時許由耳莫教更洗潁川波
麒麟自掣黃金鎖騷衷終鳴白玉珂
知爾匣中雙寶劍塵埃他日為誰磨

答雷長史四首

每誦清詞動我愁
山中歲暮若為酬
因攀桂樹遙相憶
欲寄梅花可自由
萬里江湖雙涕淚
百年天地幾交遊
誰憐舊日中朝客
謫向玉門半白頭

二

玉壘青城萬里山
亦知歸興滿鄉關
沙邊返照寒將斂
江上行雲晚未還
道路南來多壅隔
雲霄北望少追攀
曳裾受簡皆清事
莫向滄浪羨我閒

三

汝上相逢歲已長，故人官況近荒涼。
天涯白髮催遲暮，客裡清尊送夕陽。
賈誼功名終負漢，馬卿詞賦尚遊梁。
看君尺素遙相慰，況是羊何有和章。

四

十載寒氈鄭畫師，風流文采更堪思。
朱門鼓瑟官仍達，青殿揮毫出每遲。
百里風烟還薄暮，孤城雨雪已多時。
極知歲晚傷心切，起傍宮梅自詠詩。

送馬公順視學湖南四首

關中人物從來盛況汝才名天下稀得路驂騑看獨步
出塵鷹隼羨高飛十年京洛猶今日萬里江湖更落暉
同是燕臺舊遊客可堪相見又相違

二

洞庭雲夢眼中寬襄國荆門掌上看三楚樓臺皆壯麗
萬年江漢自波瀾烟花白日空愁暮鴻鴈青春尚避寒
莫道秦川歸未得人間今日路行難

三

兩年懷抱值君開
聞說京華首重回
天上故人難再見
世間岐路轉堪哀
孤舟落日三江口
遠客浮雲萬里臺
南斗尺書相望切
暮天鴻鴈幾時來

四

武昌南望盡雲沙
楚岸湘亭更好花
桃李百城開士館
星河中夜傍仙槎
南宮書畫新連舫
吏部文章舊滿家
直北五雲天更遠
欲從何處望京華

王君宿邀蔡大尹過予舍至期雨候蔡不至作詩

促之

招邀數費主人迎枉顧何慙令尹情祇為泥途妨出郭
未應風雨却寒盟雲間不見仙鳧下花外如聞駿馬鳴
玉馬凌空休更怯銀鞍傍險亦須行

讀李子良獄詩有感

北朝宮闕已陵夷南渡衣冠更亂離誤國始知金櫃冊
蒙塵空嘆翠華旗龍爭虎鬪中原破海倒江翻萬古悲

猶是昔時歌舞地風塵今日淚還垂

早春眺望

山郭輕寒細雨開水邊沙逕獨徘徊艱難世事樓田里
潦倒年華斷酒盃晚日殘霞皆自媚白梅青柳遞相催
茅堂春色無人見迸淚看花日幾回

感春

羸病江湖春意生清沙遲日眺

一作照

孤城綠堤塹柳葉

相暗隔屋山桃花獨明萬里江天雙起鴈誰家園樹亂

鳴鶯風光物色元非惡觸目經心偏苦情

寄五清先生

地北天南一寄聲楚山蜀道兩關情他鄉歲月仍羈旅
故國風塵尚甲兵張翰本非思玉鱠謝安終不忘蒼生
遙瞻山斗徒勞仰苦恨江湖不易行

懷西涯先生

六省尚書第一班兩朝元老領千官空教外國聞裴度
未見東山起謝安歸去朝廷公望重老來湖海路行難

兵戈此日交馳檄將帥何時議築壇

寄希哲望之二兄

東風悵別十年懽北斗愁臨五夜看
海內君親情獨苦天涯兄弟見俱難
孤城落日黃鸝暮紫塞青春旅鴈寒
君夢可曾回故里予心終日在長安

寄任司訓

江湖不見任公子風雨常懷老鄭虔
異域親朋皆萬里故鄉花柳又新年
青春已共浮雲去白日難同逝水還

為道故人從別後一身顛顚淚雙懸

寄馬君卿固安

絃歌今作王畿宰辭賦元傾上國人
易水塵沙連雨雪漢家樓觀接星辰
交期祇望雲間履生計猶慙海上綸
寇盜縱橫朋舊隔江湖此日淚盈巾

雨中留蔡黃二親

門巷泥深過客難百年聊共此盤餐
浮雲落日山河暮細雨青春樓閣寒
近夜蛟龍還入浦久陰鴻鴈更移灘

年華滾滾相逢少莫厭扳留到夜闌

清明日上先祖并兄墓

城西鬱鬱見佳城駐馬山頭悵獨行萬古松楸此丘壠
百年花柳又清明音容地下空成夢骨肉人間益愴情
更望老親封墓地恨隨春草一時生

袁惟武邀客泛舟夜下次韻

春水逶迤碧樹邊滿筵賓客醉開船情親不厭頻來往
語笑何妨更接連遶岸星河天共轉近城鐘鼓夜初傳

人間此會真非易荏苒春風為爾憐

葉四公子西園

邀客西園公子家東風二月已飛花
巷遮碧柳行春馬樓倚青山落暮鴉
移席尊壘遙出浦入舟燈火更依沙
清吟况接同鄉彥應有文星動水涯

張太守宅同賈長教會集

遲日香風細細迴招邀更喜廣文陪
千年又下南州榻二月同傳北海杯
午院雲陰移几席春城雨色映樓臺

三鱸五馬皆高客獨愧江鷗共往來

春興

東風回首即殘春日日清江愁白蘋北去雲霄無道路
西來天地有烟塵身經貴賤知交態事到安危憶古人
却喜故園桃李樹花開又見一回新

袁冲霄先生同惟學過訪

風起高城春日斜相留肯醉野人家白雲對酒看山色
青草題詩到水涯隔岸鳴鶯深坐樹傍樓飛燕故穿花

竹林萬古追遊地二阮風流未足誇

同高鐵溪先生劉朝信兄宿賢隱寺次韻

雨過青山暮色來僧堂客至燭花開半空樓閣星河動
滿院松梧鶴鶴回浮世黃塵兼赤日古人白骨已蒼苔
兵戈此際同盃酒愁聽春城鼓角哀

袁惟學南園

樹裏行盃坐日斜池邊立馬聽鳴鴉苔陰雨暮寒青竹
水色春深靜白沙開徑蓬蒿無俗客入城花柳似山家

百年懷抱君應識不是淹留為物華

登謝臺

故國蕭條登此臺暮雲春色轉相催
蓬蒿滿地悲風起樓觀當空倒影來
山鳥不隨歌舞散野花曾傍綺羅開
今來古往無窮事萬載消沉共一哀

楊花

三月楊花裊裊白憂人淚點暗中拋
漫天撲地有何意惹草粘沙多似毛
忽趁狂風翻自遠更遮落日強相高

紅塵滿眼青樓暮攪亂春愁為爾勞

暮春

城邊楊柳飛白花河上春風吹暮沙
飄飄歲月此雙燕渺渺江湖聊一槎
人情翻覆似波浪世態變化如雲霞
駟馬高車有憂患只須料理東門瓜

秋夜

黃菊花垂霜月陰碧林丹樹各蕭森
關山日暮豺狼近海水天寒鴈鷺深
萬事誰能看倚伏此身何必問升沉

干戈未息瘡痍在永夜遲迴折寸心

賢隱寺別劉朝信

臘近孤城送客難一尊蕭寺共悲懽
山空木葉鳴風急水曲松林背日寒
岐路人間妨躍馬十年天上憶鳴鸞
知君此去長安近擬向雲霄直北看

歲暮

歲暮孤城日易陰溪邊茅屋苦寒侵
江湖更覺龍蛇遠霜雪翻教燕雀深
病起一身惟縱酒愁來雙淚忽沾襟

山林鐘鼎皆吾志北望悠悠萬里心

對雪懷劉朝信

十月孤城雲黯黯萬峰飛雪此溪邊
烟霞細細縈寒日風急飄飄落暮天
何處玉珂迷紫陌幾家銀燭照華筵
茅堂此際堪乘興不放山陰半夜船

寄胡宗器悼內

玉簫不聽鳳凰鳴銀漢愁看織女星
永夜機中悲蟋蟀十年牕下拾流螢
白頭司馬空多恨清淚安仁更苦形

見說生兒是奇器他年應慰九泉靈

穀日

翠壑烟開風滿林岸雲沙雪暝陰陰城邊瓜地謀生計
溪上青山獨往心野客開樽閒共語田夫負耒亦相尋
茅堂春事年年異不廢鶯花此日吟

送任宏器入京二首

四十功名亦壯年丈夫才氣豈徒然渡河春羨蛟龍起
望闕晴看日月懸江畔梅花初送雪天邊楊柳正含烟

悲歌此日臨燕趙未許奇遊屬馬遷

二

與爾相逢已十年孤城此別意蕭然
春來鄉里交游少日暮江湖涕淚懸
騏驎未應辭道路豫章終擬出風烟
因君遙起長安思況是征鴻又北遷

再送宏器

春日城邊駐客車夕陽山下惜離居
燕關悵望風雲外楚水分攜雨雪餘
萬里登臺先郭隗十年題柱老相如

長安三月鶯花爛得意休忘尺素書

題葉邦重山水畫限韻

我愛君家畫裡峯更看茅屋傍雙松白雲不是人間路
滄海終期物外蹤野徑一春無駐馬石潭深夜有蟠龍
移家欲向溪邊住坐聽青山日暮鐘

題張給事安期圖為乃翁壽

黃髮仙翁白鹿車安期親見棗如瓜玉盤已獻千年實
玄圃先開五色花壺裏青天長日月眼中滄海又塵沙

觀圖究識封君面壽酒頻來給事家

贈楊靜之歸真陽

人物遙從泮水看眼中鄉里舊衣冠江鴻終擬登達路
海鵠還應愛羽翰九月黃花聊對酒千山紅樹正憑欄
真陽城外秋仍好悵望西風白露繁

到寺

樓閣山空暮景懸上方鐘鼓晚來傳白雲獨照孤燈裏
新月遙臨雙樹邊常怪陶潛慵入社亦知蘇晉愛逃禪

高僧老衲真吾侶
蘭若松林可度年

太虛上人為起書樓

書樓新起賴休公
況接丹梯百丈通
祇為雲松巢此地
不須車馬到山中
白雲倚檻臨丹壑
明月開軒坐碧空
更作百年投老計
已將別業傍禪宮

遊西山胡本清邀留

獨馬尋僧春到寺
萬山邀客晚登臺
野人門巷松邊入
稚子盤餐竹下來
江鳥亦隨山鳥喚
紅花偏映白花開

頻遊苦為東風意況是情親豈浪猜

新色寺與諸生留別

落日鄉山客淚邊離懷相對各淒然秋原臺殿臨寒景
長路風塵入暮天去國已違丹壑志望鄉空賦白雲篇
平生師友兼恩義未卜相逢是幾年

趙生書屋

城中無日不塵埃騎馬尋朋此地來籬落過人驚鳥雀
庭階留客掃莓苔不妨濁酒綢繆醉況有秋花爛漫開

人世相逢元未易高城鐘鼓莫頻催

題任宏器思親卷

十載音塵別夢遙月寒山色暮烟高
慈烏樹老情空在杜宇林疎血未銷
恨入東風傷綠鬢淚隨芳草濕青袍
海天恩義憑誰話目斷雲孤思正勞

贈嚴生

嚴生開卦南門市一日聲名動此邦
共喜君平今有後誰傳郭璞世無雙
白雲晝覆焚香室清月宵臨讀易窓

金
卷二十一
不把升沉更問汝行藏吾已傍滄江

述懷

紫芝黃獨幾回新霜雪山中又見春萬古光陰雙過客
五年江海一歸人豺狼滿地無行路戎馬他鄉有戰塵
潯水河邊釣臺上分明天與此閒身

送周大

月白寒城菊有花孤燈落葉映交加冬亭霧露縈沙曲
夜閣星河傍水涯千里賓朋常命駕百年公子更通家

梁山楚水無多路來往風塵易歲華

題劉朝信唐學士瀛洲圖

香裊重簾玉署清翠微樓閣報平明
花邊歸馬仙袍濕柳外啼鴉御苑晴
秦國姓名青簡重龍圖風月彩毫輕
千年芳躅君應接共看層空一鶚橫

送惟學南還

以下京集

一年賓館空彈劒九月燕京未授衣
世路風塵悲旅鬢春園花竹夢荆扉
扁舟舊泛心常往萬卷今開志豈違

京國重來又三載臨歧真恨不同歸

送趙司訓喪偶還羅山

燕姬砧杵催楊柳楚客衣裳緝芟荷宦況不為游遠賦
閨情空續悼亡歌愁聞鄭監青氈苦老覺安仁白髮多
日暮千山歸故國秋深一鴈度黃河

送易太史歸省湖南

楚鄉秋去息風塵碧石清沙江色新八里競迎金馬士
趨庭遙拜白頭人天邊拄杖尋南嶽海畔登樓望北辰

亦是長沙詞賦客莫看搖落重傷神

八日王宗哲宅見菊

燕臺菊樹艷秋堂楚客鄉心益渺茫人世幾回逢一笑
天涯明日過重陽高雲錦石寒相映細雨清沙濕不妨
況是右丞多雅詠可能無興醉花傍

九日雪答崔太史

常年九日多風雨風雪今年更可哀颯颯仍無木葉下
輝輝故弄菊花開關河朔氣催燕塞城闕秋陰起漢臺

今日春秋誰紀異亦知君是廣川才

苦熱

燕京閏夏清凉阻楚客羸軀毒熱偏
雨過即如卑濕地雲來翻助鬱蒸天
南邦僻地寒江閣西嶽高峯玉井泉
思有丹梯凌倒景恨無孤棹截長烟

雨中

苑上行雲細裊裊城邊鳴雨忽垂垂
炎天樓閣虛相映燕地風塵日自悲
滄海未通吳貢賦黃河猶閃漢旌旗

腐儒退食真何補
悵望寒江暮有思

聞河南寇

檄書近報河南寇
楚塞梁關轉戰空
豈有兵車能遠救
即愁道路阻難通
江淮城塹西南險
嵩洛山川天地中
今日至尊憂不細
幾時諸將捷音同

西海子

寺下烟波春不開
苑中風浪隱樓臺
源泉細繞西山出
雲氣深從北極來
萬里乘槎觀日月
十年登閣望蓬萊

黃塵碧水須臾事莫使魚龍夜夜哀

汝忠宅待月同望之

空堂濁酒三人醉萬里清光迥未開深夜西隣還鼓吹
東望有樓臺虛疑星漢城邊照實怕風雲海上來
孤燈各愁思九關哀角更相催

大復集卷二十五



總校官庶吉士臣侍朝

校對官編修臣馬啟泰

謄錄監生臣令狐慕蜀

謄錄監生臣沈智